



Tukkies is diep in die knyp

Koos Venter

Die Universiteit van Kaapstad (Ikeys) het die Universiteit van Pretoria (Tukkies) Maandagaand op hul tuisveld teen die hang van Tafelberg met 23-13 geklop.

Daarmee is die Pretorianers se 2018 Varsitybeker-veldtog amptelik in 'n krisis gedompel.

Tukkies se vierde agtereenvolgende nederlaag beteken dat David Manuel se span se fokus in hul oorblywende vier wedstryde eerstens op oorlewing sal wees.

Die wen van die toernooi maak in hierdie stadium waarskynlik nie meer deel van hul korttermynbeplanning nie.

Tuks het Maandag in Kaapstad goed begin en eerste punte aangeteken toe heelagter Christo Hamman oor die doellyn is.

Toe buitensenter Adrian Seerane ook gaan druk, wou dit lyk of Tuks op pad was om hul eerste wedstryd in vanjaar se reeks te wen.

Ongelukkig kon Tinus de Beer nie een van die drieë verdoel nie.

Die Ikeys het stelselmatig teruggekom in

die wedstryd met twee verdoelde drieë.

'n Strafdool deur De Beer het tot die spanningslyn in die wedstryd bygedra en met een punt verskil tussen die twee spanne en met slegs 'n paar minute speelyd oor was die wedstryd in die weegskaal.

Tuks het teen die einde verwoed aangeval, maar Ikeys het besit omgekeer en hul buitensenter, Liam Furnis, was die held van die dag met sy drie in die doodsnykke van die wedstryd.

Volgens die reëls van die toernooi, sal die span wat vanjaar heel onder eindig outomaties gereleëer word na die Varsity Skild liga.

Die topspan in dié liga sal op[sy beurt opskuif om in die Varsitybeker te speel.

Tuks sal dus tot elke prys uit die laaste posisie op die punteleer wil wegom en dit beteken dat hulle nie kan bekostig om weer te verloor nie.

Trouens, Tuks sal hoop om selfs hoër as tweede laaste (agste) op die punteleer te eindig omdat die span in dié posisie ook die kans staan om gereleëer te word.



Tuks se kaptein, Tinus de Beer, probeer sy spanmaats motiveer in Maandag se Varsitybeker-wedstryd teen die Ikeys in Kaapstad. Foto: Varsity Sports